

四庫全書薈要·乾隆御覽本

集部

盈川集卷五

唐 楊炯 撰

碑

少室山少姨廟碑

臣聞崑崙西北之天門也則五帝處其陽陸三王居其正地泰山東南之日觀也則秦皇刻其石銘漢帝探其玉策故知建都邑正方位割崇墉剗濬洫必憑天地之

險然後四海為家擁神休尊明號協時月同量衡必致
山川之祠然後羣神受職少室山者山嶽之神秀也憑
河圖而括地用遁甲而開山發揮宇宙之精噴薄陰陽
之氣壁立而千仞削成而四方北臨恒碣猶如聚米南
望荆衡繞同覆蕡共工氏觸皇天之八柱未足擬議龍
伯人釣溟海之三山無階響像考於含神霧白玉猶存
驗於山海經黃花不落其名有序則太室西偏其位可
知則嵩高佐命若乃乾坤之所合雷雨之所交仰臘七

星之野俯鎮三河之曲朝市臨於域中樞機正於天下
六合交會於是又有天帝之下都九州名山於是又有靈仙
之窟宅臣謹按少姨廟者則漢書地理志嵩高少室之
廟也其神為婦人像者則故老相傳云啟母塗山之妹
也昔者生於石紐水土所以致其功娶於塗山室家所
以成其德后宗之位象南宮之一星外戚之班比西京
之列傳惟幾不測其道無方騁神變而揮霍降精靈而
肸蠁亦猶蔣侯三妹青溪之軌跡可尋虞帝二妃湘水

之波瀾未歇何止祠稱丁婦廟號勝姑少女宅於西宮
夫人館於南嶽山臨白岸空聞石室之靈浦對青崖獨
有金臺之異若斯而已矣時更魏晉數歷周隋四望於
是莫脩八神以之無主炎涼代序寧觀俎豆之容霜露
沾衣非復絃歌之地國家乘天造之草昧屬人謀之與
能奄有大寶遂登神器天地水火之無象則女媧氏補
之於是乎鍊其五石東西南北之失位則神農氏立之
於是乎甄其四海天皇貴與天乎合德富與地乎侔貲

窮變化之理盡神明之數伏羲畫卦唯觀鳥獸之文黃
帝垂衣蓋取乾坤之象利兼於成器功周於備物瑤臺
美化闡邦國之風猷銀榜嘉聲茂君親之典禮稱才子
者八族則叔獻季狸有亂臣者十人則太顛閼天若夫
圓丘方澤所以饗天神地祇複廟重櫨所以序文昭武
穆命秩宗之位分太宰之官考虞夏之質文定殷周之
損益其大禮有如此者高陽有飛龍之樂始會八風帝
舜有儀鳳之音初調九奏后夔典其教制氏辨其聲鐘

磬竽瑟致其和尊卑長幼成其序其廣樂有如此者太
微營室明堂布政之宮白獸蒼龍象魏懸書之法下應
猶草王言如絲北辰而拱衆星南面而朝天下其為政
有如此者糾萬人者施以八刑誥四方者戒之三典畫
衣不犯載酒無寃免禽獸於網羅納寰瀛於軌物其恤
刑有如此者周人之養國老始闢西膠漢氏之召諸生
初開太學辟雍所以行其禮泮宮所以辨其教童子三
尺羞談霸后之臣冠者六人惟述明王之道其文德有

如此者涼風至司馬於是乎陳兵太白高將軍於是乎
宜戰乘斗杓而誓旅出星門而杖鉞莊周稱天子之劒
舉之按之呂望言聖人之兵如風如雨其武功有如此
者稽其殷令有文犀利劒之効珍考其周書有諸白乘
黃之騁力東漸西被南馳北走盧敖之窮觀六合不出
於城隍陶兀之飛入八門未游於宮室其疆理有如此
者察璿璣以孚大運天回地游吹玉律而部人時陽動
陰靜烟雲蕭索而合彩日月淑清而啓旦豈直鳳巢阿

閣入軒后之圖書魚躍中舟稱武王之事業其休徵有
如此者然則囊括混沌發揮生靈大庭不足使驂乘驪
連不足使扶轂可以會玉帛可以答靈祇行聖人之大
孝既郊祀而宗祀昭帝王之盛節亦因天而事天猶復
下聽輿人旁求故實以為唐堯五載無聞太室之儀殷
帝八遷未卜王城之地是用陳圭置臬建周后之兩都
詔蹕鳴鑾巡漢王之中嶽熒惑先列招搖在上隱天而
動地欵野而歛山旌旗則日月運行鐘鼓則雷風相薄

道伊闕據轂轅怡然肆望邈乎周覽壯靈山之雲雨仍
求載祀之經對閑寢之丘墟思秩無文之禮於是降天
渙命司存因其舊跡葺其新廟詳費務議工徒下隴蜀
之名材致荆藍之寶玉易者言乎悅使人忘其勞詩者
歌乎子未成之不日東西轇轕南北崢嶸繡栢兮雲楣
光照耀兮奪目桂棟兮蘭橑氣氤氳兮襲人皎日登於
楹出長廊而中宿窮山海之瓊寶盡人神之壯麗豈止

河庭貝闕俯瞰馮夷之都洛水瑤瓊旁臨處妃之館爾
其巖嶂重複岡巒左右青霞起而照天白露生而布地
餘基隱嶙仍知萬歲之亭古木摧殘尚辨三花之樹明
公舊祀棟宇嵒堯仙女層臺風烟爛熳軒轅之訪大隗
先求牧馬之童太一之徵少君直下乘龍之使夫峻極
也天帝因而會昌夫降神也景福由其興作於是乎昭
之以明德聽之以和聲可以羞澗溪沼沚之毛可以奠
潢汙行潦之水聰明正直惟鬼神而有知玉帛犧牲實

陳信而無愧日之吉靈之采蜺為旌兮翠為蓋雷為車
兮電為策鼓之以南箕風嫋嫋而先路潤之以西畢雨
冥冥而灑道其始至也若海靜山空曠曠朧朧照白日
于扶桑之東具少進也若移星轉漢燦燦爛爛吐明月
於瀛洲之半佩珠璣而玓瓅襲羅縠而飄颻建晨纓之
寶冠踐遠游之文履命儔兮嘯侶徙倚兮徘徊羣仙畢
集衆靈咸至有西華之紫妃有中黃之素女華山之上
明星遠燭陽臺之下暮雨潛通或瓊室以飛霞或銀臺

而薦樂天孫忽降鑿停支石之機神女相歡即起投壺
之電左侍右衛則甲申之瓊石乙巳之蘭蕭妍倡妙妓
則憑悅之清歌幽靈之鼓瑟樂章既闋禮容斯備回風
兮雲旗入不言兮出不辭荷衣兮蕙帶儻而來兮忽而
逝惟神享德降百福而無疆惟嶽配天視三公而有典
昔在夏后氏之乘四載仍開宛委之圖周穆王之御
八龍猶紀弇山之石况乎上照下漏天平地成人主宅
中旁羅於宇縣山靈顯位密通於神州豈使令德不傳

頌聲無紀由是三天降策有南霍之升儲八丈鐫銘有
西王之服道魏國鍾繇之字惟勒歲年晉家張載之文
遂承明詔其詞曰

上帝有命皇天無親樹之元后以牧蒸民光宅六合懷
柔百神德成郊祀禮備宗禋其一軒稱配永焜墟帝出堯
號則天汾陽詔蹕觀人設教協時同律有感必通無文
咸秩其二皇家起聖受命于天上鍊五石旁疏百川開階
運斗宅海乘乾王母益地周公卜年其三天子建德重規

疊矩聖敬日躋宗文祖武範圍三極和平萬宇率由舊

章粵若稽古

其四

璇宮夜敞銀榜朝開德象陰月聲符震

雷山河翼戴星緯鹽梅能事畢矣乾元大哉

其五

理定制

禮功成作樂日月旂常夏殷正朔德溥天外文明地角

氣白星黃風搖露濁

其六

兩京畿甸五載巡遊驅馳太一

部列蚩尤將見大魄爰尋許由迴鑾躡躅寓目周流

其七

七

鬱鬱靈鎮巖巖積石直上五千去天三百帝休非遠員

經可覲石室徘徊瓊膏滴瀝

其八

山惟地德神即陰靈瑤

姬逐雨玉女隨星陰陽不測黍稷非馨儻忽年代荒蕪

廟庭

其九

旁求祀典載垂天漢始詔林衡俄成壯觀紫柱

星錯丹梁霞煥似對青溪如遊白岸

其十

文狸赤豹電策

雷車隱隱中道甸甸太虛遂停龍駕永託神居天迴地

止霧歇雲除

其十一

衆靈啖揚羣仙容與衡岳夫人海濱

游女洛川解珮天河美杼顧慕招攜纊紛傳侶同聲同

氣爰笑爰語

其十二

于以採蘋南澗之濱于以採藻于彼

行潦日吉兮辰良浴蘭湯兮沐芳揚枹兮拊鼓奠桂酒

兮椒焚神其萃止降福穰穰

其十
三

銘

梓州惠義寺重閣銘

大辰之歲正陽之月有郪縣宰扶風竇兢字思眷昭宣
令德光闡化猷庶政惟和萬人以理閑庭不擾退食自
公遠覽形勢虔心淨域乃與禪師釋智海忘言契道寓
目於長平之山援飛莖陟峭崿削成千仞壁立萬尋俯
觀大道僅如棗葉下望須彌裁同芥子飛流滴瀝而成

響喬樹璀璨而垂榮玉堂石室千門相似大殿珠毫十
方皆現慷慨棟桷之未立可嗟棟宇之莫修不捨有為
取諸大壯觀夫左龍角右參旗前太微後營室駢羅列
以雜沓瑟蕭條以清冷上磊落以晃朗下泓澄以靉靆
參參差差森森纏纏千櫨萬栱乍合乍離蒨蒨粲粲絢
絢煥煥六采五章或同或散恭如天履直竈以雲平金火
合舍於垂珠日月相望於銜璧璇墀銀砌平接太階玉
戶金扉俛臨闔闔曳紅日舒丹霞豐隆為雷抨鏗訇於

軒檻列缺為電翕忽霍於庭除寒暑隔閡於牆垣虹霓
迴帶於廊廡仰之不極目炫炫而喪精登之無階心遑
遑而失度土木翔九垓之表仍不逮於上榮文章窮四
海之間猶未離於前城借如梵天之闕釋帝之宮兩曜
城池五雲樓觀輪王所處純金為說法之堂諸佛所遊
衆香作經行之地亦未可同年而語也夫黃金鏤榜曾
不若四攝之門青石為牆曾不若三空之地殫百工之
力建七寶之樓豈徒然哉良有以也夫何故如來神力

且觀嚴淨道師方便化作一城事有古而可質於今言
有大而可徵於小是則毘耶四會俱發道心險路衆人
咸知寶所其銘曰

長平山兮建重閣上穹隆兮下磅礴紛被麗兮駢交錯
嚴色相兮冲寂寞誰所為兮天匠作

表

為劉少傅等謝勅書慰勞表

高宗

臣某等言司馬郎中王知敬至伏奉今月日手詔璿璣

下照覩天象之三光玉檢前開見河洛之八卦發揮珪
璧感召風雲不知手之舞之足之蹈之者也臣等稽之
天地明山闢長男之宮步之日星樂府奏重光之曲三
王所以立教者天子為先萬國所以稱貞者元良是寄
伏惟天皇御中道踐平陞對揚文武之休命紹服古先
之大業洛京朝市義協於省方秦地山河事資於監守
皇太子一物三善四方繼明孝以承親顯於直地之路
明以照下驗於長壽之術虔奉絲綸躬親政事德刑詳

矣既遠安而邇肅博愛先之亦塗歌而里詠固以禮成
恭敬道洽溫和知寶歷之無疆信蒼生之幸甚臣等竊
循愚蔽謬荷恩私或位聯輔弼職在台衡希少陽之末
光自韜螢火洽重海之餘潤已息牛涔不謂殊獎曲覃
真文俯及載之眉首奉以周旋聽葛天氏之歌方慙此
慶聞有虞氏之石未均斯喜但知懷璧之罪不可越鄉
豈敢貪天之功以為己力傾誠每積候朱鳥於南宮拜
德無由限蒼龍於左闕

議

公卿以下冕服議

古者太昊庖犧氏仰以觀象俯以察法造書契而文籍生次有黃帝軒轅氏長而敦敏成而聰明垂衣裳而天下理其後數遷五德君非一姓體國經野建邦設都文質所以再而復正朔所以三而改正朔者謂夏后氏建寅殷人建丑周人建子至於以日繫月以月繫時以時繫年此則三王相襲之道也夫易服色者謂夏后

氏尚黑殷人尚白周人尚赤至於山龍華蟲宗彝藻火
粉米黼黻此又百代可知之道謹按虞書曰予欲觀古
人之象日月星辰山龍華蟲作會宗彝藻火粉米黼黻
繺繡由此言之則其所從來者尚矣夫日月星辰者象
明光照下土也山者布散雲雨象聖王澤霑下人也龍
者變化無方象聖王應時布教也華蟲者雉也雉身被
五彩象聖王體兼文明也宗彝者虎蜋也蜋以剛猛制
物象聖王神武定亂也藻者逐水上下象聖王隨代而

應也火者陶冶烹飪象聖王至德日新也粉米者人恃以生象聖王為物之所賴也黼者能斷割象聖王臨事能決也黻者兩已相背象君臣可否相濟也逮有周氏乃以日月星辰為旌旗之飾又登龍於山登火於宗彝於是乎制衮冕以祀先王也九章者法陽數也以龍為首章袞者卷也龍德神異應變潛見表聖王深識遠知卷舒神化也又制鷩冕以祭先公也鷩者雉也有耿介之志表公有賢才能守耿介之節也又制毳冕以祭四

望也四望者嶽瀆之神也虎蜋者山林所生明其象也
制緼冕以祭社稷也社稷者土穀之神也粉米由之成
象其功也又制玄冕以祭羣小祀也百神異形難可遍
擬但取散之相背異名也夫以周公之多才也故治定
制禮功成作樂夫以孔宣之將聖也故行夏之時服周
之冕先王之法服乃自此之出矣天下之能事又於是
乎畢矣今知幾表狀請制大明冕十三章乘輿服之者
謹按日月星辰者已施於旌旗矣龍山火米者又不踰

於古矣而云麟鳳有四靈之名而玄龜有負圖之應雲
有紀官之號水有盛德之祥此蓋別表休徵終是無踰
比象然則皇王受命天地興符仰觀則璧合珠連俯察
則銀黃玉紫盡南宮之粉壁不足寫其形狀罄東觀之
鉛黃無以紀其名實固不可畢陳於法服也雲者從龍
之氣也水者藻之自生也又不假別為章目也此蓋不
經之甚也又鸞冕八章三公服之者也鸞者太平之瑞
也非三公之德也鷹鶲者鷹鳥也適可以辨刑曹之職

也熊羆者猛獸也適可以旌武臣之力也又稱藻為水
草而無法象引張衡賦云帶倒茹於藻井披紅葩之狎
獮請為蓮華取其文彩者夫茹者蓮也若以蓮代藻變
古從今既不知草木之名又未達文章之意此又不經
之甚也又毳冕六章三品服之者按此王者祀四望服
之名也今三品乃得同王之毳冕而三公不得同王之
袞名豈惟顛倒衣裳抑亦自相矛盾此又不經之甚也
又黼冕四章五品服之大者考之於古則無其名驗之

於今則非章首此又不經之甚也若夫禮惟從俗則命
為制令為詔乃秦皇之故事猶可以適於今矣若夫義
取隨時則出稱警入稱蹕乃漢國之舊儀猶可以行於
代矣亦何取於變周公之軌物改宣尼之法度者哉

盈川集卷五

盈川集卷六

唐楊炯撰

神道碑

後周青州刺史齊貞公宇文公神道碑

惟黃帝大電之精以太清而張樂惟高辛招搖之象以人事而紀官於是乎生我司徒敬敷五教翼贊虞帝而咸熙庶績惟殷湯受天明命以統九有之師惟微子崇

德象賢以為萬邦之式於是乎生我丞相約法三章光輔漢室而威加四海大齊宣皇帝商周之日號西伯以稱臣太祖高皇帝堯舜之朝避南河而革故司空臨川獻王懿親明德論道經邦中庶子平樂侯開國承家丹書白馬於是乎生我齊貞公惟魏之寶惟周之幹開上帝而格天地變陰陽而平水土詳求典載歷選台衡或大澤而康帝圖或高丘而濟王業諸侯五百伊尹出於庖厨甲士三千太公起於屠鈎未有上從軒后下及全

齊聖主明君三居域中之大帝師王佐累及人臣之重
古所謂歿而不朽者抑斯之謂與公諱彪字明俊蘭陵
人也即宣帝之玄孫高皇之曾孫臨川王之孫平樂侯
之子稟神河岳藉慶王侯攀兩曜之末光乘五行之秀
氣溫厚廉讓當時以為達人宣慈惠和天下謂之才子
屬三方鼎立九土星分祿去公朝失諸侯之盟會政由
梁國建天子之旌旗士女同嘆於商墟鬼神共謀於曹
社公杜門屏迹心不自安與門生故吏數百人歸於後

魏宣武皇帝以客禮待之詔除給事中假龍驤將軍正
光五年兼彭城府長史假節則將軍比於王濬優禮則
長史兼於杜襲龍驥可畏晉后任之於渡江騏驥不乘
魏氏託之於留府六年除通直郎散騎常侍中書侍郎
永安三年帝北巡遷撫軍將軍銀青光祿大夫散騎常
侍散騎通直起於天興之元中書侍郎始自黃初之代
宣王撫軍之號僕射光祿之名奇才總於文武重任歸
於將相徐方叛逆以公為行軍長史兼統別部仍加鼓

節彭城宋邑海岳徐州嶧陽孤桐羽猷夏翟昔稱都會
今實邊陲魯伯禽始得征伐周穆王遂行天討公手執
旗鼓入侍帷幄以陶侃部分之明當阮孚戎旅之重有
如荀羨獨負逸羣之才不學江道空有連雞之喻徐州
平遷黃門侍郎揚州大中正黃扉藹藹青瑣沈沈有若
張公之萬戶千門博觀圖籍大湖為浸會稽為山有若
荀勗之十郡一州詮藻人物累遷大司農秦稱內史漢
曰司農管夷吾陳不惗之名耿壽昌立常平之議時播

百穀后稷讓於虞書阜成兆民列卿拜於周典普泰元
年遷車騎將軍加右光祿大夫永熙二年出為潁川太
守地稱汝潁俗尚申韓有鄭伯之別都有周公之朝邑
教之德化無因歷於八年任於賢能旁潤踰於九里於
時齊武王居中作相實有遷鼎之謀周太祖在外持兵
深懷事君之道昭公失位由季氏之執權襄王出居成
晉文之霸業三年秋八月武帝幸長安以義兵從順大
統元年授開府儀同三司封靈壁縣開國子邑三百戶

金提石印清濟濁河爰賜土田以為藩屏漢之宰相始
開封邑周之列侯實兼卿士二年拜車騎大將軍九年
遷五兵尚書十年遷中書監領驃騎大將軍加開府儀
同三司進爵為公增邑一千戶天子有詔不入軍門匈奴
奴未滅不營私第蔡謨兼五兵之署鄧騭比三台之儀
掌中書之綸翰加上公之冕服十六年遷侍中驃騎大
將軍以下並如故昔惟常伯令則侍中切問近對拾遺
補闕冕旒無象先問顧和玉佩不存即徵王粲廢帝後

二年公不貲出為使持節華州刺史侍中並如故桃林
國邑大荔城隍三秦六輔之奧區五嶽四瀆之襟帶倪
寬之為內史惟事溉田薛宣之守馮翊但知拱默尋加
特進餘如故官品第一朝廷所敬辟吏如五府之間班
列在三公之後唐虞之繼文德也稷契謨明於兩朝魏
晉之順大名也裴王建功於二代周武成三年進封青
州齊郡公邑二千戶賜號東岳先生詔曰堯有四岳朕
惟公一人賜雜彩二千段甲第一區雍州良田百頃其

優禮如此堯命羲仲星鳥嵎夷之官周賜姜牙穆陵無
棣之境三王不襲同盟固於泰山百代相因舊國傳於
負海惟寶定四年公薨於長安私第天子罷朝羣臣赴
弔喪用官給鳴呼哀哉五年贈少保使持節揚光桂三
州諸軍事揚州刺史謚曰貞公禮也公少丁外艱州黨
稱其孝齊武皇帝見而嘆曰可謂吾家曾閔外祖太尉
公王儉謂其子侍中騫曰成汝宅相者在此孫乎公之
北歸也後魏宣武帝勅曰昔微子去殷項伯歸漢今又

得之於卿公泣涕橫流跪而對曰臣家國不造鼎祚淪
亡進不能匡正退不能死節今復託身有道何敢比德
古人帝因此重之及周太祖作相西朝王侯之下皆望
塵而拜公與之抗禮太祖尤相敬待屢有諮詢嘗從容
曰國家之子房也公體淳和之至性負廊廟之大才孝
通神明忠定社稷馬伏波來遊二帝晏平仲能事百君
在魏則賈誼荀攸在周則太顛閔天惟司徒克慎厥始
惟丞相克和厥中惟公載德克成厥終三后同其政道

子孫訓其成式輝光助於日月德積廣於宇宙以某年
月日葬於少陵原國遷三代年移十紀杜當陽之碑石
沈漢水而無聞仲山甫之鼎銘入匈奴而不出曾孫皇
朝右金吾將軍同州刺史得照宏才大節玉振金聲入
當天子之右軍出臨帝京之左輔承積善之餘慶襲大宗
之不遷願述家風思傳祖德是用勒銘刻石相質披文載
於景鍾大夫稱伐之義書於太常諸侯計功之道追題瓦
屑鄭康成北海之門重刻碑陰張平子南陽之墓其詞曰

黃帝攝政勤勞耳目居於軒轅戰于涿鹿咸陽黜夏
登壇受福表正萬邦纊禹舊服其逮乎微子周之國
賓降及蕭叔宋之懿親高祖丞相王述是因宣王御
史社稷之臣其太陰所立皇齊誕聖既創元基仍集
大命謀孫翼子重熙累盛天祿永終南風不競其惟公
載誕克嗣家聲千大多節三年一鳴待時而動以族而
行才歸晉國璧入秦庭四苻堅拜首降天之使陶豫策
名勤王之事任隆起草榮高近侍赫奕禁門雍容貂珥

五其

日暮青瑣夕郎之職法駕畢陳黃門次直帝王之盛

誠在農殖如京如坻我黍我稷

其六

吳王舊國採山鑄錢

公為中正佩以韋絃夏禹遺跡今來潁川公為太守示

以蒲鞭

其七

齊稱東帝周稱西伯諸侯謀王天子下席公

之忠義如彼松柏

其八

發自新邑歸於陸海魏德雖衰天

命未改功成晉鄭為而不宰寵茂山河於是乎在

其九

立

夫真將去病元勲持兵對揖絕漠行軍尚書武庫抑有

前聞侍中重席曾何足云

其十

當途遜位有周經野二國

唐虞兩朝裴賈出守馮翊人無訟者受封於齊實匡天

下其十一

晨占赤鳥夜辨黃熊曾參易筭期於令終子囊

城郢歿有遺忠明君輶朝羣臣會同其十二

黃屋左纛輕

車介士朝發桐鄉暮歸蒿里積善餘慶由來尚矣公侯

子孫必復其始

其十
三

後周明威將軍梁公神道碑

蓋聞君為元首臣作股肱或論道三槐或折衝千里至
有道存俎豆藝揔干戈高視翰墨之英猶布爪牙之旅

究青編於學府業有多聞受黃石於兵符美無遺策故
得九功咸叙七德攸彰文武不墜公實兼美公諱待賓
安定臨涇人也竦以英才遠邁知州縣之徒勞鴻以抗
節遐征覽帝京而有作由是五噫標興播金石而騰徽
七貴承榮綰銀黃而疊茂貞規盛烈映史凝圖耿紀詠
歌無俟詳確高祖禦後魏駙馬都尉侍中少保金紫光
祿大夫揚州總管贈太尉謚昭公食邑二千戶銀榜增
輝玉壺流渥位隆三少化浹五胥既而幽壠埋魂終降

槐庭之贈高門納駟式居茅土之封曾祖睿字文周尉
馬都尉鄜秦二州摠管光祿大夫兵部尚書隋益州摠
管蔣國公贈司空食邑三千戶白水時清乳虎之謠行
息祿符垂異扣馬之諫必申加以主西子之羣英名高
八座遵文翁之遺訓學富三巴茂先榮級忽光泉壤漢
祖寵章永有帶礪祖海隋沙州刺史上柱國公踐仲寧
之餘躅奸邪歛手簽孝仁之遠蹤羣胡革面連州跨郡
邁陶氏之隆基開國承家掩張門之累葉父贊隋左千

牛備身驪王府上騎柱國唐朝豐王府諮議雲州司馬
冀州長史蔣國公襲良弓於簪笏榮侍紫宮翼雕戟於
巖廊肅趨丹地西園坐讌侶明月而飛文北土行康望
浮雲而展足公漸潤膏腴發靈川獄七年可識抱杞梓
而呈才千里見知負騏驥而騁駿靈臺遠鑒與霜月而
齊明智府弘深共烟波而等曠踐仁義於區域白璧已
輕許然諾於樞機黃金豈重因心孝友宜於自然率志
謙沖得乎天性不脂韋而求達不詭計而自媒被玉軸

之文章三冬遽足窮金壇之祕訣百戰不孤譽滿寰中
聲蓋天下而學優將仕允屬名家欲昇鴻漸之姿終佇
鶴鳴之間以唐朝麟德二年補左親衛從資例也屬金
甲出戰玉帳論兵從命文皇問罪遼碣公提戈赴海投
筆從燕智者有謀仁者必勇孤鋒直進九種於是克清
定馬橫行三韓由其殄滅酬庸賞最我有力焉俯洽恩
波泛承勲級即授上柱國公深慚位薄命舛數竒雖霑
勤石之勲未展披堅之効嗟乎揚子雲之才藻空疲執

戰馬相如之文詞猶勞武騎今古同貫夫復何言既而
從牒隨班牽絲祗務起家拜朝議郎永淳元年正月三
十日授伊州伊吾縣丞非所好也路指金河途連玉塞
塵沙共起烽火相驚秋草將腓胡笳動吹寒膠欲折虜
騎騰雲公佐佑多方掌司攸寄服叛懷遠擒奸擿伏於
是完敵不敢窺邊歌頌因茲溢境曾未期月政令大行
特簡帝心超居不次永淳二年二月四日制授昭節校
尉守右衛蒲州府佐果毅仍令長上兼上陽洛城等門

供奉公洞曉戎章妙詳兵律軍國是賴戎幕允歸由是
徵道長巡嚴扁每奉朝求夕警不怠於風霜善牧能防
更申於閑阜其年十月七日奉勅命於大內祥麟殿檢
校馬公識高東野職參西極勵銜策而追風逐日加剪
拂則絕電奔星駛颶將駙驥齊衡驥驘共駒駿伏櫪於
是龍媒間出麟駒挺生伯樂多謝於精微日殫有慚於
牧養恩制褒獎又加崇秩文明元年二月二十日遷游
擊將軍仍依舊長上大周革命兩儀開闢爰覃作解之

恩式暢惟新之典勤勞夙著體望允歸拜職遷榮寔符
僉議天授元年九月十六日加威武將軍守左玉鈴衛
翊善府折衝都尉依舊長上封安定縣開國男食邑三
百戶公祇奉王庭職司兵衛八屯由其增峻五校於是
克宣翼翼兢心積劬勞於歲月勤勤忠志懷跼蹐於序
時憂能傷人竟成沈疾以長壽二年正月六日終於神
都旌善里私第春秋五十惟公弱不好弄卓爾不羣九
歲明詩七齡通易月初能對即習黃童目不相訓還慚

夫子經耳不忘歷口不遺性沈深有器度能倜儻無拓落尤重交友雅愛林泉月幌風襟每吟謠於殘綵花新葉早必賞會於琴樽加以啼猿落鴈之奇鸞驚鳳翥之妙瀉水懸河之辨背碑覆局之精標映前哲公實多敏至孝過人雍和絕俗事父母則造次不違友弟兄則溫柔必盡既風樹興感霜露纏悲聿修之德惟新欲報之恩罔極虔誠大象弘誓小乘廣樹慈仁庶憑因果月抽官俸日減私財並入薰脩咸資檀施故得雕壇之妙俯

對禪龕記葉之文式盈梵宇粵以大周長壽二年歲次癸巳二月辛酉朔二十四日甲申遷窆於雍州藍田縣驪山原舊塋禮也葬事之屬一皆官給鼓吹儀仗送至墓所墳開白日終留恨於膝城禮被皇家忽霑榮於霍隧嗚呼哀哉嗣子左千牛去疑哀纏泣柏思結食荼仰庭禮而不追覩汲書而增慕恐玄穹倚杵碧海成桑敬勤貞堅乃為銘曰

大哉嬴國遠矣少梁與秦同祖今則夏陽爰暨伯翳胙

土惟良自茲厥後人物克昌逮乎漢朝令望不已三世連輝七侯承祉或顯或晦有文有史焉奕珪璋芬芳蘭芷少保名揚司空道泰惟祖惟禩蟬聯軒蓋挺生令則在邦之最卅歲騰芳髻年超靄君號神童晚稱英傑佩仁服義既明且哲七步立成五行不輟家惟萬卷韋實三絕詞高許下學富淹中志惟謹潔心亦沖融溫淳植性朗潤在躬閨門禮洽朋友財通思若雲飛辨同河瀉兼該小說邕容大雅武擅孫吳文標董賈樹下啼猿封

中試馬且文且武執戟登位海隅不賓命我偏帥既陪
勒石還從飲至輔翊百里褒昇佐貳既揔兵權入司宮
掖徼道宵警禁門曉闢式重其駿載懷斯癖我馬既良
我軍既雄折衝千里趨奉九重行承芝詔坐啓茅封恨
深負米榮暨擊鐘爰持戒律思答慈容將福有徵謂仁
必壽如何淑德遭此凶咎孺慕崩心惄嫠宿首夜泉扃
閉天長地久

唐同州長史宇文公神道碑

諸侯計功其銘曰仲山甫誠于百辟大夫稱伐其銘曰正考甫恭于三命所以揚其先祖所以示其子孫上古之初刊於禮樂之言中年以降述於宗廟之碑文質既殊源流遂廣山河永配金石長存或旌原氏之阡或表滕公之墓觀百林之宇者孝廉之舊業於是乎不愆不忘讀黃鳥之詞者文範之餘風於是乎可久可大公諱珽字叔珉河南洛陽人也宇文歸之遠派宇文翰之餘秩燭龍晝夜於鐘山鵬雲南北於溟海自中州圮坼上

國崩離魏氏忘其寶圖齊人弄其神器則天有成命周
雖舊邦文王以業重三分昭事上帝武王以功成八百
陰隲下人車書混一於域中子弟星羅於海內方乎劉
澤乃天漢之懿親匹以曹洪即當塗之近屬及其隋室
遷鼎重運握符固亦壇社仍存山河不替曾祖顯和後
魏將軍朱衣直閣東夏州刺史車騎將軍散騎常侍長
廣郡公周贈使持節開府儀同三司延丹綏三州諸軍
事延州刺史周書有傳對揚天命保乂王家霍去病初

封冠軍周亞夫始為車騎剖符之重任在於六條建國
之榮禮高於五等祖神舉使持節驃騎將軍開府儀同
三司京兆尹柱國大將軍并潞肆石四州十二鎮諸軍
并州總管東平郡公贈少保周書有傳材優輔弼業贊
雲雷晉則羊祜儀同楚則若敖柱國王章之拜京兆天
子聞其直言郭伋之莅并州諸童符其恩信考誼隋文
皇帝挽郎皇朝益州青城瀛州清苑二縣令鈞深致遠
直道正詞不汲汲於富貴每乾乾於日夕廣都蔣公琰

非無社稷之能太丘陳仲弓自有閨門之德公慶成弧矢氣襲芝蘭劍則赤山之精照牽牛於北斗鼎則黃雲之寶入天駛於東方資大孝而立身蘊中和以成德詞參變化稽百代之闕文學富圖書閱三冬之舊史司徒袁粲許之以栝柏豫章處士禰衡目之以椅桐梓漆初任國子生擢第授道王府參軍兼鄭州參軍事橫經太學射策王庭高陽才子宣慈惠和之譽武公新邑濟河洛賴之聞兼攝務殷參卿位重王徽之任達國士升車

劉簡之博聞中郎寓直秩滿授遂州司戶參軍事天開
井絡地洩江源才雄翕習於外區棟宇相望於近甸尹
子為政知陸續於衆人黃讜臨官識包咸於數子尋遷
絳州翼城令大梁星野少澤封圻城故絳以深其宮都
新田以流其惡實惟繁劇載著循良魯國有司無擅徵
之事南陽郡吏罷休沐之娛州府狀聞鄉亭頌德亦由
禮讓之化綿竹於是乎作歌風俗之夷浚儀於是乎刊
石稍遷符璽郎尋奉勅檢校鴻臚本官如故環濟要略

掌天子之符璽劉熙釋名表京師之心腹是分麾節式
贊王侯國信不差郊迎有序遷尚書職方員外郎夏書
禹貢辨其川澤周禮職方明其物土清晨伏奏幾承題
柱之恩閑夜潔齋惟有張燈之宿詔除朝散大夫晉州
司馬尋遷長史平陽舊縣姑射靈山玉印仍存瑤城未
改習鑿齒之逢宣武三命而踐侍中管公明之謁冀州
四見而登別駕詔遷同州長史河西輜輶渭北膏腴秦
地之下邦漢京之左輔使君何以為政端右宜其得人

江統知賢直言則陳留阮宣子唐林薦善通理則汝南王叔度王祥糾合屈公輔之宏材荀羨逸羣杜沖天之勁翮享年六十有五以永淳元年六月二十一日終於華州之別業嗚呼哀哉公元亨利貞文行忠信禮樂之君子儒林之丈夫當在顏冉中求自是風塵外物友于之義伯淮與季江同寢朋從之道鮑叔與管仲推財優游大學之中籍甚平臺之下輜車就列化洽於二州油軾當官政成於半刺道尊德貴而大位不躋有志無時

而天年不永即以其年十月遷窆於鄭縣安樂鄉之西
源嗣子某官等詩禮預聞箕裘早學生則盡其養劉殷
積粟於七年歿則致其哀唐頌絕漿於九日占白鶴相
青烏鄭伯所封有咸林之采地晉侯所賂有河外之城
邑其川渭水而玉璜其鎮華山而金石沓習旛旛紛紜
野田范巨卿則素車來哭韓元良則總麻設位大夫受
梁鴻之命終陪列士之墳妻子從田豫之言竟托神人
之墓嗚呼哀哉銘曰

國自東部承家北平遂荒中縣奄有神京時逢日薄運
改天正二王之後三代之英其一惟宗惟祖有典有則大

魏將軍隆周柱國於穆顯考其儀不忒禮樂宣風閨門

表德其二

五才鍾秀百福興賢蜀都曾子漢代顏淵公之

廣學其積如山公之大辨其流如川

其三親則鄭霍地居

周鄭人物會同歌謠鼎盛設官外職天子有命束髮登

朝參卿軍政

其四

江漢之表河汾之都禮優懸榻任重前

樞六靈為貴皇天降符九州為廣益地開圖

其五

平陽土

守下部風俗秦晉閭山河軌躅緹油之化海沂之曲

始聽鷄晨行復驥足

其六

龜長筮短吉往凶來賓朋永訣

徒御相哀華館無家玄堂不開青龍水曲白馬車迴

其七

漠漠古墓郭門之路槭槭寒桐平林之東天光少日地

氣多風凡生物而必死唯君令始而善終

其八

盈川集卷六

謹案卷四第十頁後五行披圖按籍刊本披訛不

今改

第十五頁前八行大君施號令之嚴刊本施訛於

今改

第十六頁後三行都市三言終有山君之暴刊本
山訛三按格物論虎山獸之君也今據改正又
考此二句用國策甘茂市有虎語附識於此
卷五第十一頁前四行已息牛涔刊本已訛色今

改

卷六第四頁後六行進封青州齊郡公刊本封訛

聞據英華本改

第八頁前五行綰銀黃而疊茂刊本疊訛實據英華

本改

第十一頁前五行翼翼兢心刊本兢訛競據英華

本改

總校官庶吉士臣侍朝

校對官編修臣楊壽楠

謄錄監生臣莫漢

欽定四庫全書會要

集部

盈川集卷八



詳校官助教臣常循

盈川集卷七

唐楊炯撰

神道碑

唐恒州刺史建昌公王公神道碑

王氏之先代為佐命秦之霸也則王離滅楚國而三將連衡漢之興也則王陵誅項籍而五侯同拜南陽克定應圖讖而作司空西晉聿興合謌謠而濟天下昔者伊

尹伊陟但保乂於商朝太公桓公唯夾輔於周室蕭何之後居食祿而無聞鄧禹之孫在當塗而不嗣未有夏殷三統金木五遷冊命重光軒裘代襲則我瑯琊之郡有冠蓋之里乎建昌之縣有公侯之子乎公諱義童字元稚其先瑯琊臨沂人也永嘉之末徙於江外皇運之始遷於五陵今為雍州萬年人也祖僧興齊會稽令梁安郡守南安縣開國侯祿位千石珪符五等營室迫於羽儀山河入於盟誓父方賒梁正閣主簿伏波將軍梁安

郡守隋上儀同三司以惠和之德有文武之才伏波將
軍從征等於馬援儀同三司開府均於鄧騭家餘積慶
郡不乏賢代臨本州則元賓之父喜形於色繼為太守
則張翕之子迎者如雲自齊國遜位於梁庭及隋人內
禪於皇室夏禹之胄寶命集於周朝御龍之家世祿歸
於范氏公台階茂緒鼎宿精靈五百歲之賢才一千里
之皇佐忠規武節學府詞林元方閨門敬其有德少游
鄉里稱其善人實惟清廟之器是曰皇家之寶韻諧金

石奏虞庭之八音德合珪璋列塗山之萬國黄河一曲
之水莫測其源赤城千丈之巖未階其峻羣童忽聚綴
帛而引旛旗父老相呼授履而傳兵法隋授左勲衛率
非其好也河東離析海內風塵天子溺於膠船諸侯問
於金門能扶天下之危者必據天下之安能除天下之
憂者必享天下之樂我高祖神堯皇帝就之如日望之如
雲發三河之雷電平四海之厯象武王之伐黃鍼一月
臨於孟津高帝之執朱旗五星聚於東井公瞻鳥於屋

射隼於墉陳平則間行而去楚酈生則長揖而歸漢奉符繫組觀軻道之降王偃武脩文見山陽之散馬初拜車騎將軍稍遷右屯衛將軍錄有功也考於周典崇德報功稽於春秋策勲命爵車騎萬隊備涼土之羨戎衛軍千兵掌京師之屯禁于時天保初定邊方未輯二十八舍尚有吳越之妖氛一十三州猶積東南之殺氣武德四年詔公為江南道招討使鼓琴而送受命而行乘使者之輜車掌行人之旌節陸賈至於南海先責尉佗

隨何入於九江即徵黥布詔除泉州都督封昌縣男
食邑三百戶斗牛星象舜禹精靈境接東甌地隣南越
言其實利則璠瑒珠璣叙其風俗則丹雞白犬公門容
駟馬位列三刀防薏苡之譏嫌絕簡書之流謗豈知廣
州清節酌貪泉於石門含浦神君返明珠於漲海貞觀
三年詔還散騎常侍行果州刺史授期天帝肇跡人皇
南充國之舊都西巖渠之古邑岡巒紛紺天彭雙闕而
作門珠貝浮沉巴水三廻而成字公入叅師友出居方

伯金蟬石貂朱旗曲蓋纔臨蜀郡即聞來暮之謌初踐
益州已聽中和之樂七年詔遷銀青光祿大夫行恒州
刺史西街畢品北嶽恒山天開太一之宮地列并州之
鎮境分靈壽魏將樂羊之所封邑對行唐趙王惠文之
所築公政成朞月風行萬里鄧晨一郡漢帝稱為主人
李廣數年匈奴號為飛將行嘗計日郭伋不負於童兒
郡異中平王觀無私於任子既遵守德而齊禮亦勝殘而
去殺三木在殿將拜鄭弘兩鴈隨車坐悲虞國享年若

于以十五年冬十一月二十五日薨於洛陽之清化里
公家傳將相世有忠貞屬離亂之弘多值風雷之草昧
河宗兩日負鴟而謁成湯渭水七年垂釣而逢西伯將
軍再命刺史三遷仲嵩樂巴牧人之良翰龐叅虞詡將
帥之宏規立事於當年揚名於後代兄國印穀州刺史
弟國祐仁州刺史荆枝擢秀棣萼生光何止平輿之二
龍是為賈家之三虎唐虞之際四岳分居趙魏之間八
男為郡公雖勲參締構位摠班條金友玉昆良田廣宅

而能吐食下士倒屣迎賓無笑容之美人有拜賓之童
隸策名委質善始令終生當封侯克成丈夫之志死而
可作無忘事君之道越十六年二月二日葬于伊闕縣
之萬安山詔賜雜物百段給儀仗還禮也亭連長樂
城枕高都守關塞者汝寬適伊川者辛有北瞻洛汭尚
想元凱之境東望邢山依然國僑之基夫人陽翟縣君
河南褚氏即太常卿陽翟康侯亮之女中書令河南郡
公遂良之妹也宋公子之流派褚先生之苗裔弘夫人

之禮傳淑女之詩有文在手歸於魯國有鳳和鳴適於
陳氏邑之石竈縣以封邱夫尊於朝妻貴於室仙人暫
別初悲寡鶴之聲寶劍繞分終合雙龍之氣以某年月
日薨於某所越某年月日祔建昌公之舊兆長子師本
太穆神皇后挽郎襲建昌公歷韓王府祭酒岐州司士
參軍定州安喜縣令譽聞州里學富丘山以卿子而為
郎以象賢而開國朝遊楚澤暮宿燕宮東臨石柱雍為
積高之地右會長星唐是中山之邑出遊隣國不以陪

臣見朝上謁邦君不以屬官相待洛陽朝覲適見雙鳬
東都墓田行悲駟馬以年月日終於某所越某年月日
即陪葬於先兆次子師表左千牛備身遷尚輦直長厯
許州臨潁博州棠邑滄州樂陵縣州萬安果州西充五
縣令能傳祖業克嗣家聲有言偃之文章兼仲由之政
事晨陪紫極繞鈞陳之六星旦奉黃麾屯玉車之千乘
至若繁昌土宇魏文帝之墮壇堂邑隄封漢陳嬰之侯
國河分九道渤海東臨江派五津崑崙北指莫不愛人

以禮為政以德鍾離意之禁暴不用尺刀公孫述之有
神能持五縣次子師玄雋州都督府嘉徵縣丞次子師
楚夔州都督府雲安縣令芝蘭有秀羔鴈成行滇北數
十尹莫大邛都之縣邑東七百里唯有巫山之峽言其
縣職夔龍入於闕門叙其宰人鸞鳥翔於學舍咸能生
盡其養喪盡其哀積粟萬鍾恩負米而何得棟題三尺
泣吾親而不見卜其宅兆麟鳳匝其岡巒陳其簠簋春
秋變其霜露思傳舊德式建豐碑載安道作頌於鄭玄

蔡伯喈披文於郭泰魏武皇讀而稱妙非所望焉夏侯
湛見而陋之固其宜也銘曰

厥初兮后稷尊生人兮知稼穡降及文王精翼日兮衣
青光平東遷兮郊鄆晉上賓兮帝鄉秦三將兮繼代漢
五侯兮克昌比琅山兮峻極等淮海兮靈長惟祖考兮
鳴盛佩金璋兮疊映彼山川兮降靈生玉樹兮青青成
張良兮昂宿乘傳說兮箕星出忠兮入孝武繩兮文經
陳嘉謨兮制千里摛藻思兮掞天庭有隋兮喪亂土崩

兮瓦散皇運兮權輿人神兮攸贊值笙鏞兮變響屬天
地兮貞觀河兩日兮事殷井五星兮歸漢帶長劒兮暉
暉擁幡旌兮照爛周命兮惟新雲雷兮尚屯控東南兮
荒景負江海兮未賓陳禮樂兮命使動輶車兮轔轔用
蛇符兮澤國頒武節兮山人專一方兮革面重九譯兮
稱臣天垂兮星紀地連兮交趾山草樹兮潛移蜃樓臺
兮鬱起遷合浦兮太守為廣州兮刺史臨漲海兮明珠
飲石門兮貪水侃冲天兮八翼岱出身兮萬里全蜀兮

與區枕丘兮倚巴渝有靈臺兮古跡有克國兮舊都
豐貂兮左珥介士兮前驅濬三刀兮持節昌兩日兮剖
符降鳴鳩兮大夏騁神馬兮長衢畢昂兮分野蘭堂兮
四下漢皇帝兮國都耿將軍兮壇社若恒山兮詔鄧猶
朔方兮命賈李北平兮漢飛郭并州兮竹馬瞻太階兮
坐躡惜天年兮不假伊天姓兮潁川有美人兮蟬媛桂
生兮因地女嫁兮因天見乘龍兮奕奕覩飛鳳兮翩翩
知邃瑗兮有禮笑虞丘兮未賢始銜悲兮晝哭終共盡

兮千年卜龜謀兮習吉陳旨酒兮嘉粟車徒儼兮在門
旌旆紛兮竟術循洛橋兮南渡從國門兮右出樹蕭蕭
兮有風雲慘慘兮無日指丘陵兮一閉與天地兮相畢
悲孝子兮純深孰憂思兮可任訴高天兮泣血墮厚地
兮崩心樹碑兮神道無媿兮詞林歷陽之都兮水沒圓
嶠之海兮山沉俾外孫兮幼婦生白玉兮黃金

唐贈荊州刺史成公神道碑

成氏之先有周之後姬文受命三十八王鄭伯象賢二

十一代漢之少府國家維城晉之廣楊王室藩屏公諱
知禮其先上谷人也子孫避地徙于某曾祖休寧後魏
汾州刺史齊特進左右衛大將軍宇文朝江州刺史隋
成陽郡公謚曰武勲格皇天澤充區宇該備寵榮兼包
命賜祖少遐北齊民曹郎中宇文朝地官上士襲成陽
公建國之屬以訓五品以親百姓父綽隋金紫光祿大
夫唐深州刺史上柱國太中大夫金章紫綬天王使者
皂蓋朱輪公誕保靈和受茲介福講之以學合之以和

純粹以積其中文明以宣其外出於口者必是先王之言萌於心者莫非君子之德戒慎乎其所不睹恐懼乎其所不聞豈時止時行左官右徵在朝濟濟在家雍雍祗服弘業克不堂構襲成陽公歷箕州平城洛州邯鄲二縣令武鄉里閭榆社隄封公宰平城日宣三德悲歌相聚袞服成羣公宰邯鄲雷震百里儀刑嘉誨範乎人倫令聞廣譽塞乎天壤將蹈九列平三階豈意大和交薄而天道難諶降年不永春秋若干以某年月日終於

某所夫人宜城縣主聖神皇帝之堂姊王姬外館之長女夫人道峻於閨房名輝於邦國我周叙洪範作武成大賚而萬姓悅垂拱而天下理法號惟舊制贈荊州刺史生則唐堯不用歿則周武追封為龍為光有始有卒立名於後以顯其親反葬於周不忘其本以某年月日歸葬於碣石恒山燕南趙北禮儀光被宗族相臨大夫吊桓子之喪天子歸惠公之賙蘧瑗之葬不害良田孔丘之塋不生荆棘長子司衛少卿兼檢校魏州刺史太

辨中子左鷹揚將軍太方少子朝議大夫行司漢主簿
大琬等門承四代德盛三賢有終身之憂盡生人之本靈
冊褒贈宜宣無窮景鐘勒銘若古有訓嗚呼哀哉其銘曰
神岳之英大川之精如山之峻如流之清行之斯立
言之斯成登車發耀在邦有聲傳於舊國舊國惟平
宰於二縣二縣惟寧余聞舊說天降孔明誰謂靈誕喪
落淑真永錫不匱克揚其名冊書光寵沒有餘榮系曰
列星垂象兮炳天光白露為霜兮沾人裳彼蒼天兮殲

我良列星垂象兮炳天暉白露為霜兮沾人衣九原可
作兮吾與歸

益州溫江縣令任君神道碑

漢丞相之尊官大位乘輪滿於十人齊景公之利用厚
生有馬盈於千駟羽旄冠劍挺金鳴玉疊其前苑囿池
臺清歌妙舞喧其後崇高在於寵祿大欲存於食貨義
然後取橫玉帶以當仁道不虛行坐鹽梅而自得若乃
時之不與數之不通貴賤任於天窮通由於命左太冲

之詠史下僚實英俊之塲嵇叔夜之著書賤職為老莊
之地雖復勢力以高下相懸尊卑以商周不敵孔宣父
中都之小宰幽厲多藉於陪臣陳仲弓太丘之一官公
卿有慙於縣長是以德成者上道在斯尊陶潛則安枕
北窓言偃則鳴絃東武抑揚足以儀四海顧盼足以破
三軍代有人焉於斯為盛矣君諱晃樂安博昌人也其
後因官遂家蒲州之永樂天子令德軒皇為誕姓之源
諸侯計功薛國在宗盟之後西京執法則有御史大夫

東漢循良則有會稽都尉任光鄉里之忠厚任隗朝臣
之鯁直益州從事術數知名臨海真人清貞克己况乎
東西海岱強齊九合之都表裏山河全晉三分之國車
馬雷駭衣冠鼎盛盟書百代可謂功臣遷徙丘陵實惟
豪族曾祖顯祖熙考愷並策名天爵獨步人師懷素履
之幽貞保黃裳之元吉張家碑碣荊州有七代孝廉荀
氏鄉亭潁川有八人才子君外資剛健內育文明合千
載聖賢之間鍾五行金木之秀王恭濯濯春柳懷風和

嶠森森寒松列景有曾參之孝有史魚之直有子夏之文有冉求之藝先王德行固名言而在茲大聖溫良亦顛沛而於是當朝一見許其王佐之才行路相逢知其美人之贈解褐為家令寺主簿天王太子之位赫赫前星天地長男之宮巖巖左闕出身事主元良永固於萬邦東髮登朝叱鬯不驚於百里秩滿授將作監主簿千門萬戶張華窮壯麗之圖東主西賓班固盡詎謠之實職掌宮觀是名將作大司馬桓溫之府績用在於元琳

大將軍竇憲之曹文章奇於亭伯累遷右衛長史南京
左掖上將陪藩北落師門天軍列衛東觀漢記梁統有
清白之名中興晉書薛薰有恪勤之譽詔遷朝散大夫
行益州溫江縣令華陽西極漢水東流背面通秦越之
鄉左右夾巴涼之地風烟可接懸車束馬之山雲物潛
通織女牽牛之象神仙所宅則有二十四居途路所經
則有五千餘里金城石郭還聞上代之風國富人安時
聽中和之樂於是乎龍泉獨斷龜旋旁求品命千名封

疆萬戶暫過云亭乘軒之望可知且詣中軍理劇之才
有屬旌孝悌勸農桑省徭役恤鰥寡所以一縣稱平所
以百城尤最蕭育是杜陵男子不入後曹黃浮非鄉里
所知不寬同歲洛陽行馬門士無心齊國池魚權家絕
望鄭文公邵陵之縣但稱男子之名師尚父灌壇之鄉
惟有神人之哭實謂樞機八座上下三階豈惟縛柱鞭
絲操刀製錦巫馬期之任力弊起來星鍾離意之悅人
災生解土享年五十有九以儀鳳二年六月二十五日

卒於官第夫人姚氏徵士神人之女也壽丘仙葉媯水
靈苗定姚信之機衡審姚光之術藝明星燄燄不臨太
丘之前暮雨沉沉不散巫山之曲婦人謂嫁女子有行
織紝組糲棗脩榛栗南斗千齡之匣忽愴沉江北方三
代之儀終悲共穴先以咸亨三年七月二日終西京翊善
里之私第越儀鳳三年冬十一月一日歸祔於永樂縣
歷山之平原卜虞芮之閑田帶關河之設險居人致祭
桐鄉有朱邑之祠怪力成墳葉縣有王喬之墓君燕趙

奇士神仙中人容貌魁梧衣冠甚偉揚子雲之窮巷好事來遊段干木之間居通侯展敬自陳力就列居家可移妾本絕於織蒲馬無閒於食粟原子思之厚秩徧給鄉人孔文舉之中樽延留坐客加以徧觀圖史尤精釋教夢幻泡電知一切之皆空園林貨財見三陽之已爭遭時屯坎浮生蹇剥佳人不再苟奉倩之傷神赤子無期潘安仁之慘慟天乎到此命也如何及其瞋目少城歸魂舊壤平原古樹惟餘孺子之墳春露秋霜非復臯

縣之祀於是鄉鄰作主朋友加麻撰德銘之於素常披文刻之於翠石魯哀公作仲尼之誄天不憖遺蔡伯喈為有道之碑人無媿色其銘曰

軒帝之族漢朝之臣西州智士東海真人豪傑天縱衣冠日新實生其德必有其隣道在為貴知機則神氣冲南斗價直西秦太蒙之信太平之仁辨窮非馬學究成麟孝友為政觀光利賓重朋比德四海為春宮室之象南斗北辰甲兵之衛閭闔鈞陳山控金馬江迴玉輪天

文井絡地紀梁岷庭前置水甌內生塵園蠶有繭野雉
來馴時命屯塞生涯苦辛實叙虛贈玉樹長淪厚德無
輔清仁不親百年天枉一旦歸真雷鳴之下長河之濱
旌旃委鬱徒御逡巡悲風汨起血下霑巾死而可贖人
百其身

原州百泉縣令李君神道碑

金城裂地之灾玉弩驚天之禍蹴崑崙以西倒蹋泰山
而東覆三微歴數盡薰歇以聲沉萬國衣裳咸土崩而

死散是故殷憂啓聖聖人騰海岳之符草昧興王者
受風雷之祉則有思窮圖讖潛觀赤伏之萌洞識穢祥
暗察黃星之兆天懸兩日詢去就於河宗地震三川考
興亡於柱史危邦不入亂邦不居剪荆棘而叩天門臨
壇場而對休命及其玄黃再造日月重輪功成而不居
名遂而身退南華吾師也親居賤職東方達人也安乎
卑位然後武城絃唱優游禮樂之中彭澤琴樽散誕羲
皇之表雖杜當陽之文武蘭菊恒存而薛孟嘗之池臺

風烟遂歇悲夫死生命也貴賤時也用之則行舍之則藏出處者君子之恒務左右之攸宜吾聞其語矣今見其人也君諱楚才衛州衛縣人也昔繞樞神電軒轅氏之馭百靈貫月祥星顓頊氏之臨四海金科作範商丘有帝系之雲玉札披圖幽谷有真人之氣由是公侯策命歷千載而彌昌鐘鼓歡娛經百王而不替豈直將軍列位孫吳暗合之兵協律當官天地冥符之樂若斯而已矣曾祖裕後魏東宮舍人太子洗馬使持節徐州諸

軍事徐州刺史燉煌郡開國公贈充豫二州刺史真城
西望高闕東臨非無置驛之歡實有前軍之寵卿玕負
海八門都督之榮王彰穎河百代封侯之貴大父昌北
齊彭城王府中兵參軍事隋濟陰郡公襲封燉煌公文
場筆海炤爛等於星辰辨圓談叢銼鏘協於風雅九千
里之丹鳳始踐王門七十日之黃龍初階郡職考孝友
隋晉州岳陽縣令顏回稱太平王佐月角殊姿仲由稱
禮義霸臣星衡詭狀唐都晉野有恒山大嶽之風墨綏

銅章有錯節盤根之化若夫于公之宅駟馬高驅辛氏
之門五龍齊駕英靈不已還當命代之期將有後徵克
保承家之業東郊競日探祕跡於機衡西蜀談玄測靈
心於造化雄才壯思首九奏而和八音廣見洽聞披五
車而誦三箇加以興居禮樂出入孝忠簡於一人備於
萬物弓旌疊奏始命賢良幣帛交馳載徵巖穴從徵至
著溫觴萌括地之波積小成高覆蕡漸排雲之構隋大
業十二年補謁靈臺散從員外郎非其好也屬十三否

運百六災年諸侯窺玉鼎之尊天子厭金陵之氣蚩尤
則命風召雨桀黠於中州共工則折柱傾維崩騰於海
縣能扶天下之危者必據天下之安能除天下之憂者
必享天下之樂我高祖神堯皇帝所以從人望宅靈心
振天關迴地軸鼓聲雷駭親張霹靂之威旗羽星懸手
握招搖之柄君沖情索隱妙筭知來候東井而考前閼
裂西河而尊故事上略中略奏山石之奇謀文韜武韜
奉川璜之秘訣義寧二年授車騎將軍累加開府武德

五年遷右衛二十四府右車騎將軍仍於邛州鎮守皇
階甫闢猶勞尉候之虛天步初夷尚有風塵之警示之
以文德陳之以武功所以夜戶不扃所以重門罷柝六
年轉仲山府左列南州舊俗淫其白獸之祠西斂餘甿
背我黃龍之約王師直進陵劒棧以長驅廟路遐宣指
銅丘而決勝七年詔君討襲楓天棗地金門玉帳之營
方卦圓蓍剗木弦弓之射以此衆戰誰能敵之以此攻
城何城不克雷出而星曜龍騰而鳳飛一鼓而擒四姓

三戰而平百濮大夫耆老非惟二十七人拓土開疆豈
直五千餘里返行飲至捨爵策勲焉禮也其年加上大
將軍賞口十六人并良馬一疋而俄以爭功得罪游俠
從軍特降王綸遐遷騰府通塞有命潘安仁之緒言富
貴在天卜子夏之餘論無階封禪空嘆息於周南絕望
夏臺竟棲遲於漢北太宗文武聖皇帝承聖皇之大寶
奉天帝之休期雷雨八灑光華四極旌賢赦過惟新之
命屢覃念功簡勞惟舊之恩累洽貞觀元年授長樂監

仍命於北門供奉宜春禁苑太液神池浸石菌而揚波
擢金莖而挹露南經丹徼恒陪萬乘之遊北統黃山再
奉三驅之禮當是時也穆穆焉煌煌焉濟濟焉鏘鏘焉
一陰一陽而有序自南自北而無外猶復中宵不寐殷
勤多士之林是景忘疲渙汗非常之辟十四年應詔四
科舉射策登甲第明於國家之大體達於人事之始終
可謂宰相之璞可謂皇居之寶洛陽才子一承宣室之
談魯國儒生行踐中都之邑尋授靈州鳴沙縣令累遷

原州百泉縣令科通紫微印負黃州涼秋九月寒沙四
面平雲匝隴處處而秋陰圓魄低開蒼蒼而夜色君乘
輜演教佩綏臨人德被三城風移五縣抽琴命操還臨
單父之堂繫石飛鳴即對李泉之學明以御下將水鏡
而通輝清以立身共冰壺而合照神行有感方登玉鉉
之階靈化無方獨嘆瓊棺之墓春秋七十有一以顯慶
元年十二月八日終於官舍君年十一丁內艱朋友相
哀家人不識昔稱曾閔今日苟何近古以來未之有也

隋郡東曹掾江溢見而嘆曰此真可謂保家緯化嗟尚者久之大業末年皇綱漸紊不掃一室自懷包括之心獨守大玄且忘名利之境于時魏特進房僕射杜相州等並以江海相期烟霞相許付同心之雅會訖刎頸之良遊或閉戶讀書累月不出或登山涉水經日忘歸斯賢達之素交蓋千年而一遇洎塵埋五岳海沒三山辭殷而奉周背楚而歸漢深謀遠慮即良平無以加也行軍用兵則彭韓不能尚焉數奇命蹇遂無望於高門日

往月來竟消聲於下邑情均寵辱則萬象同歸跡混彭
殤則百齡俱盡浮生若寄大漸彌留遺誨子孫庶幾薄
葬等梁鴻之宅兆邈矣他鄉符祭仲之高居依然新鄭
唯仁與達君其有焉存榮沒哀此之謂也即以某年月
日葬於某原夫人廣平宋氏齊尚書左丞士順之曾孫
隋建安郡司法長文之季女霜淒月瑩菊艷苔華淑問
秀於閨房柔風治於詩禮琴前鏡裡孤鸞別鶯之哀竹
死城崩杞婦湘妃之怨長子金河府校尉上柱國輔仁

等十輪方駕萬石駢衡窺上帝之兵鉞入先王之冊府
指蒼天而永訴血不霑襟對白日以長號悲來填臆於
是總麻執友素蓋賓朋傳祖德於高陽考豐碑於太學
庶使城隍一變猶知鄧艾之名陵谷三遷尚識鍾繇之
字其銘曰

玉斗之英瑤光之精巡河并洛握紀提衡柱史論道將
軍用兵陸離簪綏奕葉公卿嶽牧騰譽弦歌有聲階蘭
豎影巖桂增榮山澤通氣風雲表靈凝脂點漆月角珠

庭白玉無玷黃金滿籯忠為令德孝實天經朋友千里
烟霞百靈琴罇野尚松竹山情數屬郡海時逢鬪星黃
龍電震白騎雷驚赫矣高祖元亨利貞聖人有作天下
文明自北提劒因茲間行攀鱗北海附翼南溟水火之
陣孤虛之營左提右挈東討西征巨猾斯斬元克載清
功符衛霍知若良平自滿知損居中忌盈蕭條異縣坎
壠浮生降以中旨賓於上京陳書詣闕對問揚庭山連
鴈塞野接龍垌朞月而已三年有成波瀾不息箭刻無

停梁木其壞高臺已傾關雲斷絕龍鴈飛鳴頓雙亮於
葉縣跔四馬於滕城

盈川集卷七

盈川集卷八

唐 楊炯 撰

神道碑

瀘州都督王湛神道碑

惟漢高祖應天順人祭蚩尤於沛庭斬大蛇於豐澤則
豐沛之豪傑乘於雲矣惟漢光武龍飛鳳翔舉新市之
八千破王尋之百萬則南陽之佐命動於天矣我高祖

神堯皇帝以唐侯而建國從晉陽以起兵協和萬邦光
宅天下則太原之衣冠有大勲矣公諱湛字懷元太原
晉陽人也十一代祖卓晉給事中母常山公主河東有
湯沐邑因家焉葬於長壽原故鄉有太原之號皇業伊
始公以中涓從事賜田鄴杜間今為雍州人也昔武王
定於下人太子賓於上帝基鄆鎬而開國籍神仙以命
氏霸則司徒所讓位天子所不臣祀則孝弟於閨門務
學於師友豈直橫江斬將南登建業之臺土食金溝北

徙邙山之宅自茲厥後數百年間國移三統周人共推
其代祿家徙五陵漢朝不易其冠冕曾祖宗邁後魏中
書侍郎彭城王府司馬周春官大夫都督晉陽侯祖亮
本州主簿司木上士隋贈信州刺史大名革於東魏天
命集於西周宗伯所以辨其儀林衡所以平其守父綽
秦孝王府掾仁壽宮監離石郡通守晉陽侯皇朝石州
刺史逆賊劉武周攻陷郡城因而遇害贈代州總管謚
曰烈侯禮也天造草昧王業艱難周師纔至於太原胡

兵遂入於離石負戶而沒不能定西戎之禍折骸而爨
不能解南楚之圍仁者殺身以成名君子有死而無貳
公承聖賢之末代屬喪亂之弘多天子乘輿方靖秣陵
之氣諸侯斧鉞莫救驪山之烽國有命而何言邦無道
而斯隱大業之季本州察孝廉非其好也高祖乃操斗
極拜圖書再駕臨於孟津五星合於東井公解衣而濟
策杖而行酈食其之長者逢漢祖而長揖袁曜卿之茂
才見曹公而不拜從平霍邑授金紫光祿大夫入長安

加左光祿大夫歷丞相相國二府典籤參軍事高祖受
禪擢為通事舍人通直散騎侍郎封金水縣侯食邑七
百戶稍遷虞部郎中丁烈侯艱去職尋起為隴西別駕
商郡二州刺史上柱國荊州大都督府司馬冀州刺史
定其封邑誓以河山蕭相立功於萬代留侯決策於千
里願持一郡洛陽之任耿純兼攝八州江東之拜陶侃
龍朔三年遷使持節都督瀘榮臻邛四州諸軍事瀘州
刺史江陽縣地瀘水提封叅伐下而為益州岐山上而

為井絡尺兵再戰黃昌兩日之歌槃水斯來景伯三年
之化功成露冕歲及懸車歎疎廣之知足慕祁奚之請
老乾封二年上書乞骸骨詔公祿賜同京官仍朝朔望
天子歷吉日協露辰郊上玄祀清廟詔公行太尉事國
之大事攝在有司蒼璧黃琮六玉以昭天地路鼓陰竹
九變而祠祖考名遂身退居常侍終山川則羣望並走
星象則中台夜拆春秋九十有三以咸亨三年七月十
七日薨於京師永崇里謚曰敏喪事官給賜物三百段

粟三百石葬日車服往還有司監護公幼鍾偏罰毀瘠
過人八歲讀書至無母何恃廢書慟哭毆血數升逮事
繼親孝聞州黨恩深母子比王元之事親夢感夫妻等
衡卿之至孝年纔一紀有若成人吏部薛公見而稱歎
潁川之司馬德操早知劉廙誰國之夏侯太初深歎樂
毅兵次霍邑力戰有功高祖嘉之賜良馬一疋進圍京
城為伏弩所中高祖臨視賜物三百段流血及屨未絕
鼓音左輪朱殷豈敢言病武德之始奉使嶺南馮盎等

稽首稱臣獻琛奉贊舍人薛卓遇害北庭詔公責問單于謝罪賜黃金五十斤雜綵二百段南踰漲海北度陰山太中大夫去尉佗之黃屋高車使者作匈奴之鐵券離石之難也枕干而寢見星而行號泣不絕聲者千里水漿不入口者數日同武陵之任襲入構諸羌異河內之張武空持遺劒吳遠由其得銘王裒以之攀栢冀州境內舊多淫祀褰帷按部申明法禁詔書遷秩百姓攀車立廟生祠樹碑頌德亦猶樂巴典郡山鬼潛移張禹

牧州江壽不起公出身六十載遺愛二十州遂罷方岳
之官仍居上台之位始於撥亂伊尹之輔成湯終於太
平軒轅之得風后然後拂衣高蹈躬覽載籍著遺誠十
八章盛行於伐法文王周易之變象尼父孝經之篇窮
性命之理盡天人之際莊周著論生也若浮史佚立言
沒而不朽越文明元年二月十七日陪葬於獻陵禮也
長子朝散大夫行扶風令遐觀等生芻一束泣血三年
不踰聖人之禮能行大夫之孝京兆載開其新阡昆吾

用昭其舊德百年宮室宛在章臺之東五校軍營依然
茂陵之下其銘曰

昔在湯武阿衡尚父下及高光蕭何鄧禹皇天眷命赫
矣高祖惟岳降神克生元輔攻城野戰張飛關羽奇策
密謀荀攸賈詡始陪營衛仍參幕府旌節龍沙軒旗象
浦出臨方岳入調風雨其生也榮池臺鐘鼓其死也哀
陳兵復土孝乎惟孝無父何怙刊石勒銘永傳終古

唐右將軍魏哲神道碑

天經地緯之帝求制禮作樂之才撥亂反正之君資拔
山超海之力繼韶夏而崇號謚非無陣戰之風披皇圖
而稽文武或用干戈之道故能彌綸宗廟彈壓山川苞
四海以為家一六合而光宅是以二十八宿懸列將而
察休徵三十五星聚天軍而赫符彩呂望垂竿於渭濱
道峻匡周張良授策於圮橋功崇佐漢乃有心如鐵石
氣若風雲洛識書名河圖秘象青絲雷燭歷大塊以三
休碧羽霜淒倚渾天而一息岑彭許先征南鎮北之名

馮異王昌大樹中軍之號杜太行而泥函谷猛氣無前
戮封豕而斬長鯨雄圖不測元戎十乘驅衛霍於前軍
甲士三千列孫吳於後殿秋風白露執金鼓而齊六軍
太山黃河折銅符而光百代建廟堂之策為社稷之臣
孰能與於此乎在我真將軍矣公諱哲字知人鉅鹿曲
陽人也七代祖靖非前秦征北大將軍鎮北地上郡其
後子孫因家於寧州襄樂縣開國承家之始誕姓命氏
之源大名發於本支當塗峻於層構三辰鬱鬱天街分

畢昴之都九野茫茫地險列山河之境丞相以萬機論
道匡大運以震威嚴尚書以八座當官贊金行而標領
袖文昭武穆方駕齊驅公子王孫朱輪華轂大鵬垂翰
馭風伯而指南溟天馬騰姿偶雲師而集東道祖唐隋
天水郡丞河陽都尉瑤林瓊樹擢標格以千尋圓折方
流委波濤而萬頃雄飛有望豈惟京兆之丞陰德不憊
何直丹陽之尉父寶皇朝通議大夫總管府司叅軍事
東家孔子至德生於上天南國申侯明靈誕於中嶽君

升朝翊贊道先王之法言公府弼諧對上天之休命若夫聖人作而萬物覩元首明而庶事康日月粲其光華山川鬱其雲雨則有英靈間出丹陵諧白獸之祥符瑞挺生黑帝感蒼龍之傑隋珠一寸魏后揚眉和璧千金秦王動色顏生殆庶聞於竹馬之年揚子參玄發自銅車之歲建情峯而直上疏筆海以橫流彫牆則百堵皆興峻宇則千門並列可大可久無忘簡易之途為子為臣率由忠孝之境郭林宗之披霧豈敢名言孔文舉之

欽風每相推薦若乃五材並用誰能去兵七德兼施止
戈為武出師於九天之上暗合兵書取法於十日之前
懸符射法固以文武之道掄揚滿於域中將相之才籍
甚間於海內貞觀十五年起家補國子博士喬林掃日
驚白鳳於詞條璧水澄天駭彫龍於義塾班超慷慨常
懷萬里之心李路平生每負三軍之氣十六年勅授左
翊衛北門長上祿賜同京官仍令為飛騎等講禮鄧司
徒之舊事馬上讀書祭征虜之前聞營中習禮宮花如

錦還臨拜將之壇槐葉成帷復對閱軍之市自皇王眷
命大帝應期運璇衡而制八方調玉燭而臨四極玄菟
白狼之野來奉衣簪蟠桃析木之鄉尚迷聲教太宗文
皇帝操斗極把鈞陳因百姓之心問三韓之罪勝殘去
殺上馮宗廟之威禁暴戢姦下籍熊羆之用公丹心白
刃本自輕生六郡三河由來重氣烏江計逆剖項籍於
五侯鹿野懲奸磔蚩尤於四牢二十年詔除游擊將軍
右武侯信義府左果毅都尉長上如故顯慶二年以內

憂解職痛深吳隱哀極顏丁晴厚地以崩魂訴高天如
泣血紫泥垂淚頻降璽書墨綏臨戎遂從金華三年詔
除左衛清宮府左果毅都尉尋園谷府折衝都尉並長
上如故又以應詔舉對策甲科遷左騎衛郎將于時長
榆歷歷烽火猶驚高柳依依邊風尚急關山夜月遂為
胡虜之秋西北浮雲翻作穹廬之氣四年詔公為鐵勒
道行軍總管陳兵玉塞按節金微學常山之蛇擬麗譙
之鶴鐘鼓嘈噴上聞於天旌旗纊紛下蟠於地伏尸百

萬因瀚海而藏舟闢地數千即燕山而築觀武臣雄略
氣憫西零神將宏圖威加北狄麟德元年詔遷左驍騎
中郎將尋檢校右監門左武衛將軍本官如故昔者封
禪陟云亭之後七十二君圖書出河洛以至三千餘歲
振兵釋旅方崇薦帝之儀道洽功成必致位天之禮粵
以皇家闢統之五十年今上開基之十七載登封告禪
玉謀金繩建顯號而施尊名揚英聲而騰光實華夷輯
睦皆承萬歲之恩朝野歡娛咸奉千年之慶乾封元年

詔加明威將軍本官如故大風遺孽叛煥青丘小水殘
魂憑陵碧海率百官於文祖尚興彭蠡之師會萬國於
塗山猶有防風之戮是歲也詔公為遼東道行軍總管
軍營對日兵氣橫天開玉堂而按部坐金城而勒陣闕
華之甲犀兕七重艅艎之舳艤千里駕鼈梁於聖海
秦皇息鞭口之威泛鼈鈞於仙洲愚叟罷移山之力然
後風行電掣將屠城塞丹浦之遙源伐黑林之奧本
王孫公子名霑卓隸之臣深谷大山境入樵漁之囿二

年詔加上柱國仍檢校安東都護導之以德齊之以刑
威振六官風揚五部兵戈載戢無勞尉候之虞桴鼓希
聞寧有穿窬之盜仰太陽而晞湛露方預四朝臨逝水
而急寒風俄悲一去齊孟嘗之下淚高榭曲池魯司寇
之悲歌頽山壞木長安眇眇還符日近之言京兆悠悠
竟絕天高之間玉關生入判自無期繡服晨還竟知何
日總章二年三月十六日遘疾薨於府第春秋五十有
四嗚呼哀哉詔贈左監門將軍禮也唯公被服忠孝周

旋禮樂仁者見之謂之仁智者見之謂之智研幾冊府
金縢玉版之書索隱兵鈴玄女黃公之法每建旗推轂
三令五申躬擐甲胄親當矢石軍井未建如臨盜水之
源軍竈未炊似對嗟來之食由是南馳北走東討西伐
運之無旁按之無下載筐宮裏遙登將軍之階閣飛漢
邊獨踐中軍之位雖龍泉匿字薰歇光沉而麟閣飛名
天長地久夫人扶風氏隋濠州刺史圓之孫也五松春
艷韋少女之祥風八桂秋雲降仙娥之寶魄謝家之子

歌柳絮而知慙劉氏之妻頌椒花而自耻三周按禮無
虧內則之風四德揚旌載闈中閨之訓宿蟠龍於月鏡
早沒鸞床矯飛翼於霞樓先沉鳳穴珠星璧月終陪季
子之階金鼎銀鑄竟列齊侯之寢以貞觀十五年五月
五日終於某所越咸亨元年某月日祔於某原長子瓜
州司倉擇木次子右衛親衛玄封等門傳萬石庭列雙
珠花萼爭榮芝蘭藹秀天經地義欽承避席之談日就
月將虔奉趨庭之教變槐檀而瀝膽木石悲酸伐露霜

以崩心幽明感動葬之以禮登之以時生人之本盡矣
死生之義備矣孝子之事親終矣於是門生故吏共緝
家聲才子文人思傳盛德庶使藺相如之生氣歷千載
而猶存隨武子之餘風登九原而可作其詞曰

文王受命畢公餘慶玉樹聯芳金枝疊映三分並列七
雄齊競建國承家重熙累盛功宣蹈舞德流歌詠河洛
垂文山川出雲驪珠育照虹玉呈文直立孤聳天然不
羣棲遲膠塾悅懌丘墳耻為儒者自許將軍伊祁不懌

軒轅討逆陣擁遼河岳鎮碣石班超投翰揚雄執戰弓
合三才刀長四尺爰清尉候載澄疆場得人者昌失人
者亡皇恩俾義帝曰明敷幽桂含馥滋蘭吐芳承天待
詔觀國賓王茂續斯遠音聲克彰鵬池森漫雞山禍亂出
閩辭家夷齒靜難金微瓦解玉亭冰泮扈駕天門陪祠
日觀萬邦胥悅千齡啓旦斗骨危城占蹄舉兵丸山霧
塞渤海波驚帝赫斯怒王師有征虔劉北貌戡剪東明
遵以文軌宣其德刑太微上將文昌貴相非熊非羆令

問令望寵踰軍幕榮參武帳本謂來朝何期返葬原野
蕭瑟風烟悽愴天道如何吞恨者多松風夜響薤露晨
歌秋月如練春雲似羅榮華減後寒暑經過青烏丘壠
白馬山河

唐上騎都尉高君神道碑

南方火德陽精赫雷電之威西陸金行秋令毒風霜之
氣達其變聖人所以定天下之文象其宜聖人所以觀
天下之變或衣裳六合舞千戚而掃虔劉或鐘鼓八紵
天下之變或衣裳六合舞千戚而掃虔劉或鐘鼓八紵

用甲兵而誅暴亂若夫皇天失紀彗孛飛流后土不綱
山河崩竭蚩尤食石災害於生人項羽拔山懸陵於上
國天子聞鼓鼙之響思將帥以龔行將軍屬甲胄之容
攬英雄而決勝則風雲潛感豪傑挺生得七星之武曲
破軍受五運之金多木少四時繁弱射連尹於葬山萬
辟太阿殺顏良於官渡然後達人知足徒興白髮之歌
烈士徇名不受黃金之賞與夫棄其筆墨漢家封萬里
之侯稱爾戈矛周王命百夫之長豈可同年而語哉君

諱則字宏規其先渤海人也後代因官遂家于涇州之
安定縣神房阿閣太山橫日觀之峰金闕銀臺滄海簸
天虛之岸風土形勝關河表裏三分六州之大業師尚
父贊其經綸一匡九合之元勲齊桓公拓其疆場高柴
至德籍東魯之聲名高鳳沉研盛西京之學校英才磊
落而秀發人物蟬聯而間起三光不墜察高星於太紫
之宮八柱無疆奠高巖於中黃之城曾祖冲北齊鷹揚
郎將周右屯衛清宮府別將成軍夜火教戰秋風九天

揚後一之兵六合擁前三之陣張良入漢行觀滅楚之
徵微子奔周坐見亡殷之兆祖赦周褒郡南和縣長陶
元亮攝官於彭澤道契羲皇陳仲弓歷職於太丘德符
星緯飄風驟雨不入灌壇之鄉暴武蒼鷹潛出瑕丘之
境考才朝議郎上開府孫子荆之天骨亮拔不羣王夷
甫之道心神鋒太峻議郎清秩縣符處士之星開府崇
班上接台階之位君雄心獨斷猛氣無前用兵書六甲
於自然知射法三篇於性道早圖星象管公明懷察變

之心幼識旌旗陶恭祖有行師之畧屬隋人版蕩天下
崩離朱陽夾飛鳥之雲紫極現雄雞之象陳兵爭戰窺
玉策於中州姚石壇場竊金符於寓縣我高祖黃雲大
帝白水真人風雷海嶽之純精天地陰陽之正氣媧皇
受命殺黑龍而定水灾漢祖乘機斬白蛇而開火運君
夜觀乾象晝察人情審熒惑之謌謠驗嵩山之讖記關
中王氣不勞甘德之言沛國真星無待殷馗之說賊薛
舉豺狼梟獍擣杌窮奇守幽龍以行灾負關河而作孽

天王按劍出軍於玉帳之前猛將分麾受律於金壇之下以義寧二年王師薄伐趙國公長孫無忌精兵若獸利器如霜問君以帷幄之謀待君以心腹之寄營當月暉因八門之死生陣法天星乘五將之關格蔭華蓋歷明堂以我和而制其離以我直而摧其曲敗楚師於柏舉未足權衡執秦俘於崤陵無階等級此實君之功也其年詔授朝散大夫賜物三百段排患而釋滯功成而不居比竦傳以辭榮追留侯之高蹈三靈革故君子於

焉待時四海清平謀臣以之歸第自太王基命成康隆
玉版之圖高帝受終文武盛金刀之業家給人足天成
地平猶勞水旱之餘尚想京坻之積咸亨三年春奉勅
於河陽檢校水運使搜粟都尉河堤使者銅橈鐵舳蒼
鷹白鶴之船竹箭桃花貝闕龍堂之水引紅粟於淮海
汎歸舟於秦晉遂使齊臣獻納先陳不涸之名漢后絲
綸即有常平之號望千石之氣可以療饑開萬箱之儲
自然知禮此又君之功也其年詔賜上騎都尉嗟夫河

流曲直天道盈虛鬼神莫之要聖賢莫能預高臺下泣
孟嘗君之惻愴可知梁木興謌孔宣父之平生已矣上
元三年春三月日終于樂邑里之私第享年七十六惟
君魁梧動俗符彩驚人忠孝天資溫良日用一門兄弟
盡同鍾毓之車千里賓朋時命嵇康之駕每至白雲生
海素月流天未嘗不顧眄山河抑揚琴酒馮異之大樹
對諸將而無言子夏之名山謝時人以長往四林遊及
八水忘筌能祛有漏之因早得無生之法雖十年俱盡

陸士衡之喪嘆有微而千載猶生闇相如之壯心恒在
即以冬十月丁酉葬於定安東南二十里之平原禮也
陶公相宅郭璞占墳面丹鳳而背玄龜兆青鳥而徵白
馬三百篇之後卜筮何從二千石之榮子孫無替長男
仁歟中男仁楷少男上護仁昉等或體窮三變潘陸不
足以升堂或力敵萬夫關張不足以扶轂有元方季方
之長幼傳學詩學禮之門風金友玉昆忠臣孝子窮號
積於心髓創鉅纏於肌骨星辰已變昊天無報德之期

霜露潛移君子有終身之感葬之以禮垂制度於三王
思之以時別蒸嘗於四季然後按韋賢之舊德叙潘岳
之家風冀達銘北海之文張昶刻西山之石若使鄧將
軍之一見自得嘉名魏太祖之來觀懸知絕唱其詞曰
金闕千仞銀宮百常發揮雷雨震動陰陽山水形勝人
神會昌九州霸業賜履勤王樂只君子邦家之光驚雷
氣候大昂徵祥運屬飛海時逢吸霜中原逐鹿西嶽亡
羊漢起高帝周興太王乃披荆棘即奉壇場國步猶阻

黎元未康將軍不拜使者相望陣合星斗兵符玉璜礮
夷叛逆刷滌邊荒化穆三代時清九皇猶思禮節尚試
堯湯漕通淮海水泛舟航蒼鷹鷁舳紫貝龍堂功立身
退懸車杖鄉百年俄頃萬緒悲涼昔時華屋今日玄房
平天慘慘半月蒼蒼地謂西部山言北印曲池無處松
櫛成行

唐昭武校尉曹君神道碑

君諱通字某其先沛國譙人也近代因官遂居于瓜州

之常樂縣故今為縣人焉顓頊高陽之子孫曹叔振鐸
之苗裔山河白馬漢丞相開一代之基燕沛黃龍魏武
帝定三分之業承家卹脩嶽峙星羅居雍州之西境斷
匈奴之右臂門容駟馬旌旗玉塞之雄坐列三貂人物
金行之秀祖某隱居不仕父顯盪寇將軍洞庭寶玉廣
都鸞鳳或閭閻之內禮敵於諸侯或枹鼓之間威振於
千里功則可大以官族而為官德亦不孤惟將門而有
將君天才卓越雄畧縱橫陶謙性好於幡旗王濬志在

於長戰東方諫議口誦孫吳諸葛武侯坐吟梁甫屬有
隋之末四海分崩皇運之初三光草昧五星同聚田橫
猶在於海中九伐飛榮魄囂尚屯於隴右賀拔盛操符
誓衆斬木稱兵以被髮左衽之餘負櫈杌窮奇之號遂
欲驅馳我塞北撓亂我河西天子不憚於廟堂鼓其雷
電使者相望於道路申其弔伐武德元年乃詔侍中楊
仁恭出使先之以德義陳之以兵甲七旬干羽不籍有
苗之師萬國侯王坐見防風之戮君深知逆順獨斷胸

懷去危即安轉禍為福非如馬援遨遊二帝之都不學
竇融自保三分之重勅授昭武校尉鮮卑醜類慕容殘
孽遷於大棘之城止於小蘭之界雖謂其羣下願聞禮
於上京而拜於將軍遂誇大於諸國貞觀八年詔特進
代國公李靖為行軍大總管登壇拜將授鉞行師開太
一之三門閉陰符之六甲決勝於俎豆然後折衝萬里
信賢如腹心故能匡正八極君當仁不讓聞義則行從
王粲之戎旅棄班超之筆硯係單于之頸有類長沙斬

樓蘭之王更加平樂詔除上騎都尉車師舊國俯枕前
庭戊己遺墟斜連後壁負天山而版蕩擁蒲海而虔劉
聖人之德非欲窮兵蹟武王者之師蓋為夷凶靜亂十四
年詔兵部尚書侯君集為行軍大總管軍營玉帳武畧
珠韜旌旗蔽於日月金鼓聞於天地安人保大實憑帷
幄之謀斬將搴旗咸藉武夫之力君綱懷高義思報國
恩從來六郡之子是為萬人之敵梯衝所及攻靡堅城
矛戟所臨野無橫陣一舉而清海外再戰而滌河源飲

至策勲抑惟恒授詔除上柱國君備嘗艱阻頻有戰功
天子聞之累加徵辟慕田疇之節羞賣盧龍之墓高魯
連之義請從滄海之遊遂乃散髮鄉亭拂衣丘壑為趙
魏之老在義皇之年關內諸公深知郭解洛陽人物高
談劇孟家僅有禮皆使拜賓門客多才咸能市義南宮
養老坐聞鳩杖之榮東岳遊魂俄見鶴書之召以龍翔
元年某月某日終於里第嗚呼哀哉夫人某官之女也
沅湘降祉河洛騰休符玉石之堅貞貫風霜之慘烈鏡

飛天上窺祥鳳於銀臺劖動星文秘蛟龍於玉匣以其
年某月日終越某年月日合葬於某原君孝實因心忠
為令德鮮花匝樹盡兄弟之歡娛好鳥鳴林展交遊之
宴喜太初朗月俯照金鞍叔夜清風來生寶劍故能戰
必勝攻必取西零種族遙憚武臣北漢首豪見稱飛將
雖死之日猶生之年園令獨慕於相如漢帝長懷於李
牧長子游擊將軍和政府右果毅都尉上柱國永雄次
子朝散郎行西州柳中縣主簿上騎都尉知君等三餘

廣學百戰雄才就養之方薰申愛敬慎終之道不忘哀
戚雖雨崩防墓無孔子之格言而鼠齧前松有文王之
故事即以其年月日改葬於木城之平原長婦某氏即
永雄之妻也某官之女柔風淑譽習禮聞詩上奉舅姑
旁睦娣姒溫家之婦方歡白玉之臺盧氏之妻空對黃
金之枕先以永淳元年某月日終至是即陪窆于塋內
右翊衛宏軌兵圖日用劖術天知六郡許其良家三川
養其聲利思宏祖德願叙家風託無媿之銘跋涉載勞

於千仞訪他山之石東西向踰於萬里烟効官昌運負
謹明時始以東宮學士出為梓州司法傾蓋相逢當仁
不讓庶使見曹娥之碣楊修歎其好辭讀元壽之文高
祖稱其佳作其詞曰

大矣丞相天地翼亮蒸哉王侯子孫蕃昌條分葉散源
濬流長金城北峙玉關西候山澤駢羅衣冠輻湊降神
生德興賢誕秀曰萬人英材標國楨髫年學劙卽歲論
兵以身許國東討西征皇家啟聖撥亂反正逆賊遊魂

不恭王命亦既授首河西大定蕞爾湟中車書未問帝
赫斯怒攢其英雄風行電轉谷靜山空二庭遺孽交河
路絕天子聞鼙元戎案節王師無戰海外有截歸我田
廬功成不居歲云秋矣日月其除壽非金石命也何如
孝乎兄弟葬之以禮蓼蓼者莪人生若多言猶在耳邈

若山河

謹案卷七第三頁前四行策勳爵刊本命訛舍

據英華本改

第七頁後六行天垂兮星紀刊本垂訛童據英華本
改

第八頁前一行有克國兮舊都刊本克訛充據英
華本及漢書地理志改

卷八第九頁前七行按節金微刊本微訛徽據英
華本改

第十三頁前八行舞干戚而掃虔劄刊本戚訛歲

據英華本改

總校官庶吉士臣侍朝

校對官編修臣馬啓泰

謄錄監生臣宋益源